

Izjava visokoga predstavnika/predsjedavajućeg Upravnog odbora Vijeća za provedbu mira



Ambasadori Upravnog odbora Vijeća za provedbu mira održali su sastanak u Potočarima povodom 30. godišnjice genocida u Srebrenici

Ambasadori Upravnog odbora Vijeća za provedbu mira (PIC SB) sastali su se danas u Potočarima povodom 30. godišnjice genocida u Srebrenici. Sjednici su prisustvovali i članovi Odbora šefova vodećih međunarodnih organizacija. Sjednica je održana u Memorijalnom centru Srebrenica-Potočari u znak podrške naporima za obilježavanje 30. godišnjice genocida u Srebrenici i odavanja počasti sjećanju na njegove žrtve.

Članovi rukovodstva Memorijalnog centra Srebrenica-Potočari, zajedno s predstavnicima udruženja žrtava, predstavili su učesnicima sjednice planove za obilježavanje 30. godišnjice genocida pri čemu je iskazano duboko poštovanje prema njihovoj neumornoj posvećenosti istini i pravdi kao osnovama za izgradnju povjerenja i trajnog mira i stabilnosti.

„Održavanjem sastanka u Potočarima, ovom jedinstvenom mjestu sjećanja, još jednom potvrđujemo opredijeljenost međunarodne zajednice za pružanje podrške Općem okvirnom sporazumu za mir i postignućima ostvarenim tokom tri decenije njegove

provedbe“, rekao je Christian Schmidt, visoki predstavnik i predsjedavajući Upravnog odbora Vijeća za provedbu mira.

Memorijalni centar u Potočarima je državna institucija od izuzetne važnosti, s jasno definiranim mandatom da čuva sjećanje na Srebrenicu, te da kroz obrazovanje, prepoznavanje i pomirenje doprinosi prevenciji bilo kakvog nasilja zasnovanog na etničkoj pripadnosti. „Upislenici Memorijalnog centra imaju kvalifikacije i sposobnosti da kreiraju viziju iskrenog dijaloga među svim narodima i mirnog suživota. Riječ je o sjećanju i o donošenju ispravnih zaključaka. Nikada više građani Bosne i Hercegovine ne smiju postati žrtve mržnje, podstrekivanja ili nasilja zbog svog porijekla, vjerske ili etničke pripadnosti“, naglasio je visoki predstavnik Christian Schmidt.

Učesnici su ovu priliku iskoristili da još jednom naglase čvrstu podršku međunarodne zajednice suverenitetu, teritorijalnom integritetu i ustavnom i pravnom poretku Bosne i Hercegovine i njenom kontinuiranom napretku ka evropskim i evroatlantskim integracijama.